

## REGLUGERÐ

### fyrir vatnsveitu Stykkishólms.

#### 1. gr.

Vatnsveita Stykkishólms er eign Stykkishólmshrepps. Heimili hennar og varnarþing er í Stykkishólmi.

#### 2. gr.

Hreppsnefnd Stykkishólmshrepps fer með yfirstjórn vatnsveitunnar og ber ábyrgð á skuldbindingum hennar. Hreppsnefnd og sveitarstjóri annast daglegan rekstur og framkvæmdir vatnsveitunnar, en heimilt er að ráða sérstakan vatnsveitustjóra eða umsjónarmann til að sjá um eftirlit eða framkvæmdir við vatnsveituna, ef þess gerist þörf.

#### 3. gr.

Reikningsár vatnsveitunnar er almanaksárið, en skrifstofa hreppsins annast allt reikningshald. Reikningarnir skulu endurskoðaðir á sama hátt og reikningar sveitarsjóðs og fylgja þeim ár hvert.

#### 4. gr.

Stykkishólmshreppur hefur einkarétt til reksturs vatnsveitu og sölu vatns á því svæði, sem vatnsveitan nær yfir og hún getur fullnægt, svo og til hafnarinnar í Stykkishólmi.

#### 5. gr.

Hreppsnefnd lætur leggja vatnsæðar svo víða um kaupúnið, sem þörf krefur og fært þykir, svo húseigendur eigi aðgang að þeim við veg, götu eða opin svæði, sem hús þeirra liggja að.

#### 6. gr.

Allar vatnsæðar frá dreifikerfi vatnsveitunnar, að húsi og í því, eru eign húseiganda og ber hann kostnað af lagningu þeirra og viðhaldi. Vatnsveitan getur ákveðið að heimæðar eða hluti þeirra skuli lagðar af starfsmönnum vatnsveitunnar, en á kostnað húseiganda.

#### 7. gr.

Hver sá, er óskar að fá vatnsæð tengda að húsi sínu, gera endurbætur eða breytingar á eldri lögnum, skal sækja um það til hreppsnefndar og gera grein fyrir áætlaðri vatnsþörf og til hvers vatnið skuli notað. Vatnsveitan sér um tengingu frá vatnsveituað gegn sérstöku tengigjaldi.

Allar lagnir skulu lagðar undir eftirliti starfsmanna vatnsveitunnar og ber húseiganda að fara í öllu eftir fyrirmælum þeirra að því er snertir efni og frágang.

#### 8. gr.

Hverjum húseiganda og notanda er skylt að halda vatnsæðum sínum vel við og láta tafarlaust gera við þær ef leki kemur að þeim. Skal þess sérstaklega gætt að ekki frjósi í leiðslunum. Ef eldri vatnsæðar liggja svo grunnt í jörðu, að hætta sé á, að í þeim frjósi, ber húseiganda að láta bæta úr því á þann hátt, sem starfsmenn vatnsveitunnar telja fullnægjandi.

Enginn má eyða vatni að óþörfu.

Ekki má tengja dælur eða aflvélar í samband við vatnsveituna, né tengja sam- aðrar vatnsveitunnar og önnur veitukerfi, t. d. sjóveitur, nema með sérstöku leyfi hreppsnefndar.

**9. gr.**

Starfsmönnum vatnsveitunnar er heimilt að fara um hús manna og lóðir, þar sem vatnsæðar liggja, til þess að athuga þær og tæki þau, sem sett eru í samband við vatnsveituna. Ef þeim þykir umbúnaði í einhverju ábótavant, skal húseiganda skylt að bæta úr því tafarlaust. Ella getur vatnsveitan látið vinna verkið á kostnað eiganda.

**10. gr.**

Hreppsnefnd er heimilt að loka vatnsæðum fyrir þeim, sem vanrækja að láta gera við bilanir á vatnsæðum eða tækjum, sem við þær eru tengd, eyða vatni að óþörfu eða greiða ekki vatnsskatt á réttum gjalddaga. Vatnsskatt ber að greiða að fullu, þótt lokað sé fyrir vatnið af þessum ástæðum.

**11. gr.**

Vatnsveitan hefur rétt til að takmarka vatnsnotkun, ef skortur er á vatni eða loka fyrir vatnið vegna hreinsunar eða framkvæmda við vatnsveituna. Ef eldsvoða ber að höndum hafa slökkvilið, lögregla og starfsmenn vatnsveitunnar heimild til að gera hverjar þær ráðstafanir, sem nauðsynlegar teljast, hvort sem er á vatnsæðum vatnsveitunnar eða í einkaeign. Óheimilt er öðrum en slökkviliði, lögreglu og starfsmönnum vatnsveitunnar að taka vatn úr brunahönum vatnsveitunnar nema með sérstöku leyfi.

**12. gr.**

Vatnsveitan ber ekki fjárhagslega ábyrgð á tjóni, sem leiða kann af rekstrartruflunum, er verða vegna vinnu við æðar vatnsveitunnar, takmörkun á vatnsnotkun eða af öðrum ástæðum.

**13. gr.**

Til þess að standa straum af kostnaði við vatnsveituna skal árlega greiða vatnsskatt af öllum húsum, sem standa við vegi eða opin svæði og vatn er lagt í. Vatnsskattinn skal miða við fasteignamatsverð húsanna, en ef hús hefur ekki verið virt fasteignamatsvirðingu ákveður hreppsnefndin vatnsskattinn.

**14. gr.**

Hreppsnefndin getur ákveðið að setja upp vatnsmæla hjá þeim fyrirtækjum og einstaklingum, sem nota mikið vatn, t. d. frystihús, vinnslustöðvar, iðjuver o. fl. og selja vatn eftir mælingu, eða ákveða að allt vatn skuli selt eftir mælingu. Skal þá vatnsveitan sjá um uppsetningu mælanna og kosta eðlilegt viðhald þeirra, en skemmdir af mannavöldum eða frostum ber húseiganda að bæta. Ef mælingu verður eigi við komið má ákveða sérstakt gjald fyrir hverja framleiðslu- eða vinnslueiningu.

**15. gr.**

Vatnsskattur skal vera 4% — fjórir af hundraði — af fasteignamatsverði húsa. Auk þess greiðist fast gjald kr. 500.00 af hverju íbúðarhúsi eða hverri einstakri íbúð.

Af öðrum húsum en íbúðarhúsum greiðist aukaskattur kr. 1000.00 af hverri húseign, ef vatn er ekki selt eftir mæli.

**16. gr.**

Ef vatn er selt eftir mæli skal greiða kr. 2.00 fyrir hvern m<sup>3</sup>. Auk þess leigu fyrir hvern mæli kr. 200.00 á ári.

Gjalddagar samkvæmt þessari grein skuli vera tveir, 30. júní og 31. desember.

**17. gr.**

Fyrir vatn til skipa í höfninni greiðist kr. 20.00 fyrir hvern m<sup>3</sup> og greiðist gjaldið við móttöku. Heimabátar greiða fast árgjald, sem ákveðið er í hafnarreglugerð.

**18. gr.**

Fyrir önnur vatnsnot en þau, sem að framan eru talin, og ef mælingu verður eigi við komið, skal greiða gjald, sem hreppsnefnd ákveður.

**19. gr.**

Í stofngjald (tengigjald) skal greiða kr. 1000.00 fyrir íbúðarhús, en kr. 2000.00 fyrir önnur hús.

**20. gr.**

Gjöld samkvæmt reglugerð þessari, öll þeirra eða hvert um sig, getur hreppsnefnd hækkað eða lækkað um allt að 100%.

**21. gr.**

Gjalddagi vatnsskatts er 15. janúar ár hvert, nema annað sé sérstaklega tekið fram.

Gjalddagi vatnsskatts fyrir árið 1970 skal þó vera 1. apríl.

**22. gr.**

Öll gjöld samkvæmt reglugerð þessari má taka lögtaki og eru þau tryggð með lögveði í viðkomandi eign næstu tvö ár eftir gjalddaga og ganga þau fyrir hvers konar sammings- og aðfararveði.

**23. gr.**

Brot á reglugerð þessari varða sektum allt að kr. 10 000.00 nema þyngri refsing liggí við að lögum. Sektin rennur í sveitarsjóð.

Ef einhver veldur skemmdum á vatnsveitunni skal hann bæta þær eftir mati tveggja óvilhallra manna.

Mál út af brotum á reglugerð þessari skal fara með að hætti opinberra mála.

Reglugerð þessi, sem hreppsnefnd Stykkishólmshrepps hefur samið og samþykkt, staðfestist hér með samkvæmt vatnalögum nr. 15 20. júní 1923 til þess að öðlast gildi þegar í stað og birtist til eftirbreytni öllum þeim, sem hlut eiga að máli.

Jafnframt er úr gildi felld gjaldskrá fyrir vatnsveitu Stykkishólms nr. 45 21. marz 1949.

*Félagsmálaráðuneytið, 12. maí 1970.*

**Emil Jónsson.**

*Hallgrímur Dalberg.*